

Ataatsimut atuinermi itigartitsisarneq attaveerutsitsisarnerlu pillugit Namminersorlutik Oqartussat nalunaarutaat

Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut peqqussutaanni nr. 17-imi, 20. november 2006-imeersumi § 6, imm. 1 aamma 4 naapertorlugit aalajangersarneqarpoq:

Ataatsimut atuilernissamik qinnuteqaatinik itigartitsisarneq

§ 1. Akuersissummik pigisaqartup ataatsimut atuilernissamik qinnuteqaatit akuerisussaavai. Taamaallaat itigartitsisoqarsinnaavoq uku innersuussutigalugit,

1) qinnuteqaat kiffartuussinerimik tuniniagaqartumit, nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut peqqussutaanni § 6 naapertorlugu atuisinnaatitaanermut akuerineqarsimanngitsumit saqqummiunneqarpat.

2) qinnuteqaat ataatsimut attaveqarnissamut tunisassiamut imaluunniit ataatsimut attaveqarnissamut atuisinnaatitaanermut, ingerlatsinissamut akuersissummik pigisaqartup nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut peqqussutaanni § 6 naapertorlugu atuisinnaatitsinissamik pisussaaffeqarfigingisaanut tunngasuuppat, imaluunniit

3) eqqarsaatigisassanik, itigartitsinissamut tunngavigineqarsinnaasunik annertuunik peqarpat.

Eqqarsaatigisassat tassaassapput:

a) nalunaarasuartaatitigut attaveqaatit imaluunniit nalunaarasuartaatitigut kiffartuussinerit eqqorneqartussat pigiinnarneqarnissaat

b) kiffartuussinerit attaveqaatillu iluini paasissutissanik illersuinissaq

c) paasissutissanik inunnut tunngassuteqartunik illersuinissaq

d) nalunaarasuartaatitigut attaveqaatinik imaluunniit nalunaarasuartaatitigut kiffartuussinerimik illersuinissaq

e) pineqartut nunami sumiiffinni, pisinnaasatigut suliassatigullu annertusineqarnissaannik

pisariaqartitsilerit, akuersissummik pigisaqartumut teknikkikkut aningaasaqarnikkullu annertuumik ajornartorsioqqaarani naammassineqarsinnaanngitsut.

Ataatsimut atuinermik killilersuineq attaveerutsitsisarnerlu

§ 2. Eqqarsaatigisassat § 1, imm. 1, nr. 3-mi taaneqartut innersuussutigalugit ingerlatsinissamik akuersissummik pigisaqartoq ataatsimut atuinnissamut isumaqatigiissuteqarnermini, ataatsimut

atuinermik ingerlareertumik killilersuiniarluni attaveerutsitsiniarluniluunniit kissaateqarpat, tamanna

pillugu Nalunaarasuartaateqarnermut Aqutsisoqarfimmut saaffiginnittoqassaaq. Tamatuma kingorna ataatsimut atuinermik killilersuinissaq attaveerutsitsinissarlunniit pisinnaatitaaffigineqarnersoq pillugu Nalunaarasuartaateqarnermut Aqutsisoqarfik aalajangiissaaq.

Imm. 2. Imm. 1 apeqquaatinnagu ingerlatsinissamut akuersissummik pigisaqartup sumiiffinni eqqorneqartuni ataatsimut atuneq erngerluni aammalu Nalunaarasuartaateqarnermut Aqutsisoqarfik ilisimateqqaarnagu attaveerutsissinnaavaa, illuatungiliuttup atuinera attaveqaatinik kiffartuussinernillunniit imaluunniit assigisaannik qamittoornermik kinguneqartoq, tamatumaniluunniit annertuumik ulorianartorsiortoqarnera uppenarsarneqarsinnaappat.

Imm. 3. Imm. 2 naapertorlugu ataatsimut atuneq killilersorneqarpat attaveerutsinneqarpallunniit, ingerlatsinissamik akuersissummik pigisaqartup erngerluni illuatungiliuttoq tamanna pillugu ilisimatissavaa.

Imm. 4. Imm. 2 naapertorlugu ataatsimut atuneq killilersorneqarpat attaveerutsinneqarpallunniit, attaveerutsitsineq Nalunaarasuartaateqarnermut Aqutsisoqarfimmut nalunaarutigineqassaaq.

Atuutilerfia

§ 3. Nalunaarut 1. januar 2014-imi atuutilerpoq.

Namminersorlutik Oqartussat, ulloq 4. november 2013

Steen Lyngé

/

Ann Birkekær Kjeldsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

